



**ALOKUSAUN**

**SUA EXELÊNSAI KAY RALA XANANA GUSMÃO NIAN**

**PRIMEIRU MINISTRU REPÚBLIKA DEMOKRÁTIKA TIMÓR-  
LESTE**

**ABERTURA BA SEMINÁRIU MARKA 1º ANIVERSÁRIU  
AUTORIDADE NASIONAL PETRÓLEO (ANP) TIMOR-LESTE  
NIAN**

**Salaun Konferênsia Ministériu Negósius Estranjeirus  
22 Agostu 2009**

Exelênsia, Senhora Procuradora Geral da República

Membrus Korpu Diplomátiku

Membrus Governu

Prezidente ANP no Diretores sira

Reprezentantes husi Kompanhias Petróleu i Gás

Distintus Konvidadus

Senhoras no Senhores

Ho laran haksolok tebes tanba bele mai hamutuk ho Ita Boot sira iha ne'e hodi halo abertura ba semináriu loron ida nian kona-ba "*Dalan atu sai Autoridade Regulatória ida ke di'ak liu iha Rejiaun ida ne'e*", no asinala primeiru Aniversáriu Autoridade Nasionál Petróleu ne'ebé habadak ho naran ANP.

Tinan uluk, iha fulan Julhu, ha'u inaugura mós eskritóriu foun instituisaun ida ne'e nian iha Palásiu Governu rohan, husi parte Lorosaé, depois asisti mós tomada-de pose ba Timór-oan lubun ida ne'ebé mesak foin sa'e, maibé hatudu motivaun ás tebes no prontu atu kaer rasik organizaun ida ne'e. Expetativas boot tebes ba organizaun ida ne'e, ne'ebé administra rekursus ida ke bele dehan importante liuhotu iha ba Rai ida ne'e, mak rekursus petróleu.

Senhoras ho Senhores

Funionáriu ANP

Iha Junhu 2008, Konsehu Ministrus aprova Dekretu-Lei ida kona-ba estabelesimentu instituisaun ida ne'e, ho independênsia administrativa i financeira. Institutu ne'e hahú oficialmente nia servisu iha dia 1-de Julhu 2008, iha loron ida ne'ebé Autoridade Deznada Tasi Timór remata ona bazeia ba arranjus iha Tratadu Tasi Timór. ANP hanesan institutu públiku ida ne'ebé Sekretáriu Estadu Rekursus Naturais mak supervizona no tama iha rejime administrasaun públika indireta. ANP hanesan parte ida deit kona-ba Governu nia politika reforma ba setor ida ne'e. Iha planu atu harii Kompania Nasionál de Petroleu nos mos Institutu de Petroleu i Jeolojia.

Maibé, ita iha ne'e ohin atu reflète tinan ida ho ANP nia. Parabeins ba imi hotu iha ANP laran ba primeiru aniversáriu. Imi konsege la'o dook ona.

Maibé tinan ida moris nu'udár organizasaun ne'e tinan ida, tempu ne'ebé badak. Bainhira hahú, ha'u bele haré ona dezafius boot ne'ebé imi hasoru hanesan organizasaun no mós hanesan individu ne'ebé servisu iha ANP. Nu'udár ema ne'ebé foin sa'e (liu-liu hanesan jovens graduadus); primeiru dezafiu mak oinsá bele servisu tuir expetativas ne'ebé iha no halakon tiha ema nia presepsaun ka hanoin katak imi sei nurak liu atu simu funsaun no responsabilidades ne'ebé importante hanesan hirak ne'e. Ne'e la'ós de'it buat ne'ebé ema hanoin. Iha mós komentáriu katak *"ANP sei la hetan susesu tanba Governu halo tuir de'it buat ne'ebé nia hakarak hodi foti Timór-oan mesak foin sa'e ka labarik ba pozisioens lideransa"*. De-faktu iha ema soe-lia katak *"indústria petróleu sei monu iha semana rua laran, wainhira ANP hala'o nia atividades"*.

Maibé, imi hatudu ba ema hotu katak sira salah!

Imi hatudu ona ba Timór-Leste tomak katak imi bele administra indústria ida ke kompleksa no sofistikada tebes.

Imi hatudu katak ho fiar no delegasaun responsabilidades ne'ebé loloos i hetan nafatin apoiu ho asistênsia husi Governu, entaun instituisaun hanesan ida imi kaer ne'e sei bele kumpri di'ak duni nia funsoens ho deveres.

Distintus Konvidadus

Funionáriu ANP

Loron ida ne'e loron imi nian. Loron selebrasaun. Maibé mos loron ba reflesaun ne'eduni mak halo semináriu ida ne'e. Reflete kona-ba pasadu ne'e buat ida ke importante tebes. Hanesan organizasaun, tinan ida tempu ne'ebé natón atu halo reflesaun. ANP nu'udár instituisaun tenke reflète kona-ba nia kontribuisaun ba Estadu no ba Povu, no nia kontribuisaun ba nia dezvoltimentu organizasionál rasik.

Governu sente laran hakmatek tanba ANP bele jere no administra setór petróleu ho supervizaun Sekretáriu husi Estadu Rekursus Naturais nian.

Iha tinan ida laran administrasaun ANP hala'o, Timór-Leste kontinua simu reseitas ne'ebé boot. Ita hotu hatene ida ne'e tanba presu petróleu sa'e aas, no mós tanba imi halo monitorizasaun i kontrolu ne'ebé di'ak ba atividades petróleu. Ha'u hatene katak oras ne'e atividades explorasaun petróleu no gás lubun ida mak halo hela iha tasi laran iha áreas jurisdisaun Timór-Leste nian no iha Zona Explorasaun Konjunta ka JPDA. Ne'e mak atividades importantes ne'ebé tenke jere no monitoriza teknikamente. ANP tenke haka'as-an atu reforsa nia kapasidade monitorizasaun no nia konhesimentus. Maibé iha atividades hirak ne'e hotu, iha aspetu importante ida mak atu oinsá bele dezenvolve rekursus hirak ne'ebé temi ona hodi nune'e bele kontribui ba dezenvolvimentu ekonomia tomak Rai ida ne'e nian. Setór petroleum no gás tenke kontribui hodi fó servisu ba ema no loke tán oportunidades halo negósiu. Tanba ne'e mak ha'u hakarak husu Ita Boot sira nia atensaun ba polítikas no programas Governu nian iha setór ida ne'e.

Ha'u kompreende katak ANP sei hala'o administrasaun no jestaun ba rekursus ne'ebé la'ós de'it iha áreas jurisdisaun Timór-Leste nian, maibé iha mós área JPDA. Haktuir ha'u nia mensajen tinan uluk nian, ha'u hakarak husu ho urjênsia ba ANP atu jere rekursus iha área ida ne'e nian ho kuidadu boot tebes ba nasaun rua ne'e nia di'ak. Hanesan Austrália hetan ona benefísius iha tempu uluk, justu katak Timór-Leste mós ba futuro bele hetan benefísius tuir nia direitu.

Ha'u la iha dúvidas katak jerasaun foun sei hasoru difikuldades boot liután tan ne'e imi tenke servisu maka'as tebes. Maibé, ho perseveransa ka laran metin, haré fali ba imi nia experiênsia uluk nian iha tinan nia laran, loke laran no neon atu kontinua aprende tan buat ne'ebé foun, i ha'u hatene, ha'u fiar, imi sei hetan susesu.

Ba dala ikus, ha'u deklara katak ha'u loke Semináriu ida ne'e!

Obrigadu.